



Xalq so'zi

O'zbekiston —
kelajagi
buyuk
davlat

2024-YIL — YOSHLAR VA BIZNESNI QO'LLAB-QUVVATLASH YILI

1991-yil 1-yanvardan chiqqan boshlagan

WWW.XS.UZ

E-mail: Info@xs.uz

2024-yil 26-iyun, № 126 (8749)

Chorshanba

Saytimizga o'tish uchun QR-kodni telefoningiz orqali skaner qiling.



O'ZBEKISTON PREZIDENTI ROSSIYA IIV DELEGATSIYASINI QABUL QILDI

O'zbekiston Respublikasi Prezidenti Shavkat Mirziyoyev 25-iyun kuni amaliy tashrif bilan mamlakatimizda bo'lib turgan Rossiya Federatsiyasi ichki ishlar vaziri Vladimir Kolokolsevnini qabul qildi.



Suhbat avvalida davlatimiz rahbari yaqinda Dog'istonda sodir etilgan terrorchilik xuruj oqibatida halok bo'lgan huquqni muhofaza qilish idoralari xodimlarining oila a'zolariga hamdardlik va dalda so'zlarini bildirdi.

Oliy darajada erishilgan kelishuvlarning amaliy ijrosi ko'rib chiqildi.

Terrorizm, ekstremizm, narkotrafik va uyushgan jinoyatchilikka qarshi kurashish, shuningdek, kiberxavfsizlik va raqamli ekspertiza sohasidagi hamkorlikning dolzarb jihatlari muhokama qilindi.

Migratsiya sohasida hamkorlik mexanizmlarining samaradorligini oshirish masalalariga alohida e'tibor qaratildi.

O'z.A.

O'zbekiston Respublikasi Prezidenti Ma'lumot xizmati surati.

MO'G'ULISTON PREZIDENTINING O'ZBEKISTONGA TASHRIFI DAVOM ETMOQDA

O'zbekiston Respublikasi Prezidenti Shavkat Mirziyoyevning taklifiga binoan davlat tashrifi bilan mamlakatimizda bo'lib turgan Mo'g'uliston Prezidenti Uxnaagiyn Xurelsux 25-iyun kuni Xorazm viloyatiga keldi.

Ikki davlat bayroqlari bilan bezatilgan Urganch xalqaro aeroportida Mo'g'uliston rahbari va uning rafiqasini O'zbekiston Respublikasi Oliy Majlisi Qonunchilik palatasi Spikeri Nuriddin Ismoilov, Xorazm viloyati hokimi Jo'rabek Rahimov va boshqa rasmiylar kutib oldi.

Mo'g'uliston Prezidenti Uxnaagiyn Xurelsux dastlab Xiva shahridagi Nurillaboy saroyida bo'ldi. Mazkur saroy XX asr boshlarida bunyod etilgan, madrasa, 100 dan ortiq xona va galereyalardan iborat tarixiy majmuadir.

Saroy xonalari bezashda nafaqat xivalik mohir ustalar, balki chet ellik rassomlar, dekoratorlar ham ishtirok etgan, ular saroyning sharqona qiyofasiga Yevropaning modern uslubini singdirganlar. Xonalar ichki ko'rinishi, kaminlari, Venetsiya oynalari va tilla suvi yugurtirilgan bronzadan ishlangan, billur ilgakli qandillari bilan ajralib turadi.

Mo'g'uliston rahbari va uning rafiqasiga saroy tarixi haqida ma'lumot berildi. Tarixiy majma 2017-yilda O'zbekiston Prezidenti Shavkat Mirziyoyev topshirig'iga binoan rekonstruksiya va restavratsiya qilind.

Majma oliy martabali mehmonlarda katta taassurot qoldirdi. So'ngra Mo'g'uliston Prezidenti boshchiligidagi delegatsiya Xiva shahridagi "Ichan qal'a" majmuasini tomosha qildi.

Ma'lumki, ochiq osmon ostidagi muzey deb nom olgan "Ichan qal'a" majmuasi

YUNESKOning Umumjahon merosi ro'yxatiga kiritilgan. 26 gektar maydonda 58 ta tarixiy-me'moriy obida joylashgan muzey-qo'riqxonaning faoliyat boshlaganiga 104-yil to'ldi. 2020-yilda shahar Turkiy dunyoning madaniy poytaxti, 2024-yilda esa Islom dunyosining turizm poytaxti, deb e'lon qilindi.

Bu yerdagi osoriyatqalar mahalliy va xorijiy sayyohlarning e'tirofiga sazovor bo'lmoqda.

Oliy martabali mehmon tashrif davomida qadimiy shahardagi Ko'k minora, Ko'hna ark saroyi, Pahlavon Mahmud maqbarasi, Islomxo'ja minorasi, Juma masjidi, Toshhovli majmualarini tomosha qildi.

Ichan qal'aning qadim ko'chalarida mehmonlar sharafiga folklor jamoalarning chiqishlari, teatrlashtirilgan tomosha namoyish etildi.

Delegatsiya vakillari muzey-qo'riqxonada xodimlari, sayyohlar, hududda faoliyat ko'rsatayotgan hunarmandlar bilan suhbatlashdi.

Xorazmning tarixi, ilmfan rivojiga qo'shgan hissasi haqidagi ma'lumotlar, boy madaniyati va san'ati mehmonlarda yorqin taassurot qoldirdi.

Tarixiy obidalariga sayohat yakunlangach, oliy martabali mehmon sharafiga dasturxon yoziilib, konsert dasturi namoyish etildi.

Mo'g'uliston Prezidenti Uxnaagiyn Xurelsuxning mamlakatimizga davlat tashrifi davom etmoqda.

Ahmadjon SHOKIROV, O'zA muxbiri.

MAHALLALAR OBODLIGINI TA'MINLASH TIZIMI TAQDIMOT QILINDI

Prezident Shavkat Mirziyoyev 25-iyun kuni mahallalar obodligini ta'minlash bo'yicha takliflar taqdimoti bilan tanishdi.

Mamlakatimizda barcha dasturlar mahallalarda amalga oshirilmoqda. Bu tizimga katta vakolat va imkoniyatlar berilmoqda. Ulardagi obodlik, muhit ham shunga yarasha bo'lishi kerak.

Bugungi kunda yurtimizda 10 mingga yaqin mahalla bor. Shundan qariyb 3 mingtasi ko'p qavatli uylardan iborat bo'lib, ularga 821 ta boshqaruv servis kompaniyasi xizmat ko'rsatmoqda. Hovli uylar joylashgan 6 ming 400 dan ziyod mahallalarda esa obodonlashtirish va ko'kalamzorlashtirish ishlari, asosan, hashar bilan qilinadi.

Shu bois bunday joylarda "Mahalla servis kompaniyasi"

tashkil qilish taklif etilmoqda. Unga ko'ra bu tashkilotlar mahallalarni obodonlashtirish bilan shug'ullanadi, ko'chalar va ariqlar tozaligini ta'minlaydi, ko'chatlar ekib, parvarishlaydi. Shartnoma asosida kommunal tarmoqlarni ta'mirlash, chiqindilarni saralash va tashish xizmatlarini ham ko'rsatadi.

Servis kompaniyasi mahalla fuqarolar yig'ini kengashining qarori asosida salohiyatli tadbirkorlar orasidan tanlab olinadi.

Obodonchilik ishlari mahallaning buyurtmasi va nazorati asosida amalga oshiriladi. Servis kompaniyalari xizmatlariga to'lovlar qilish uchun mahalla fuqarolar yig'inlariga har oyda 20 million

so'mdan mablag' ajratiladi. Shuningdek, ular aholiga 20 dan ortiq ijtimoiy pulli xizmatlar ko'rsatishi ham mumkin bo'ladi.

Umuman, bu tizim natijasida mahallalarga fayz kiradi, odamlarda ozodalik va daxldorlik madaniyati kuchayadi. Mahallada yashovchi ustalar va vaqtincha ishsiz kishilarning bandligi ta'minlanadi.

Taqdimotda servis kompaniyalari avval tajriba tariqasida 208 ta mahallada tashkil etilishi belgilandi. Ushbu tajriba natijasi bo'yicha keyinchalik barcha mahallalarda joriy qilish taklifi bildirildi.

O'z.A.

MILLIY MANFAATLARGA SADOQAT NAMUNASI

Dunyo tamaddunga yuz tubdiki, insonlar xolis va tezkor axborotga muhtoj. Eramizdan avvalgi 59 yilda hukmdor Sezarning ko'rsatmasi bilan loydan yasalgan lavhachalarda "Acta diurna senatus etpopuli" — "Senat va Rim xalqining kundalik bayonnomalari" chiqqan boshlagan. Keyinchalik ana shu lavhachalar ikkita eng ibtidoiy xabarnomaga aylangan, ular "Acta senates" va "Acta diurna populi romani" deb nomlangan.

Tarixchilar ta'kidlashicha, "Acta senates" rahbariyatning o'ziga xos jarchisi bo'lgan. Unda hukmdorning amru farmonlari hamda Senat yangiliklari e'lon qilingan. Shuningdek, bashoralar, ob-havo ma'lumoti va astronomiya yangiliklari ham havola etilgan. Sababi, hokimiyat o'zining ayrim qarorlarini qabul qilishda aynan shu ma'lumotlarga asoslangan. Loydan yasalgan lavhachadan iborat "Acta senates" hukumat binolarining devorlariga ham ilib qo'yilgan.

Mushohada

Mohiyatan, shu rasmiy gazetaning ilk ko'rinishi bo'lgan, deyish mumkin.

"Acta diurna populi romani" esa xalq uchun mo'ljallangan yangiliklarni e'lon qilgan. Ular qisqa satrilardan iborat edi. Masalan, xabarlardan birining matni: "Kecha shahar ustida kuchli bo'ron bo'ldi. Shahar chekkasida dub daraxti chaqmoq urishi tufayli qulab tushdi". Yoki boshqa bir xabar: "Vino tayyorlash yerto'lasida janjal yuz berdi. Do'kon egasi

yaralandi". Bu taxtachalardan nusxalar ham tayyorlangan, ya'ni "Rim xalqining kundalik bayonnomalari", zamonaviy til bilan aytgach, ko'p adadli bo'lgan. Bu nusxalar bozorlar, xalq ko'p to'planadigan joylarda tarqatilgan.

Xo'sh, ikki ming yildan ko'proq davra nima o'zgaradi? Biz, xuddi avvalgiday, shahrimiz, davlatimiz va dunyoda yuz bergan voqealar

haqidagi xabarlarni ko'zdan kechirib chiqamiz. To'g'ri, Qadimiy Rimda yashagan shahar fuqarosi yangiliklar bilan tanishish uchun bozorga borishiga to'g'ri kelar edi, biz esa — bugungi kunda smartfonimiz ekranida barmoqlarimizni yurgizsak, shuning o'zi kifoya. Xullas, bunday harakatlarning ma'no-mazmuni, maqsad-muddao o'sha-o'sha.

Lekin bugungi zamondoshimizning axborot olish bo'yicha ehtiyojlari antik dunyo odamlaridan juda keskin farq qiladi. Qadimda biror kishi qaysidir voqea yoki muhim masala yuzasidan fikrlarni eshitmoqchi bo'lsa, Sitseron kabi faylasuf va notiqning ma'ruzasini tinglagani borishi kerak edi.

